

Ist zu mercken das solliche hoffart zu meide ist v̄  
erst darumb das sie den menschen dez teufel gleichet  
wen allein durch hoffart auß dem engel ist ein teufel  
wordenn. Wer durch hochfart wirt got geschmehet  
So der mensch vermeinet das gut von im selbes zu  
haben. das im v̄ got vorlihen ist. Furbas durch sein  
selbes wolgefallen mag d̄ mensch vordāmet werden  
Als gregorius spricht. wer sich vff erhebt d̄ veltz vor  
dez vater d̄ barmhertzigkeit. v̄ Augustinus welcher  
mensch sich seiner gerechtikeit hochmutiget der velt.

**W**ider die vierdenn vorsuchung ein geusset  
der engel ein sollich lere. O du armer wurub  
bist du hochuertig vnd wilt nicht betrachte  
wie du dein stetigkeit in dem glauben: hoffnūg vnd  
gedult nit von dir selbes sinder von got hast. als er  
spricht. On mich mugent ir nichtz vorbringen vnd  
mer r̄im dich nicht. Vber heb dich nichtz. leg dir sels  
bes nit zu einmicherley gutheit. Vnd mer spricht der  
herre. Welcher sich erhoet der wirt genidert. v̄ aber  
es sey dan das ir werdet als die kleinen kinder. So  
mūget ir nit ein gehen in dz reich der himel. darumb  
bis demutig: Wen wa sich demutiget d̄ wirt erhoet  
Augustinus bis demutig so kumpt got zu dir. Ob  
du dich aber erhoen wilt so wirt er von dir weichen  
Darumb kere dich von hochuart die den lucifer aller  
engel fursten in den scheuslichsten teufel vorkert hat  
vnd yn die tieffe der helle vorstosenn hat Die ouch  
als. Bernhardus spricht einn anfang ist gewesenn  
aller sunde v̄ einn vrsach alles vbelis. Darumb leg  
hin die hoffart so werde alle deine sude abgeschniten.